

11
L. D. B. V.
THESES MEDICÆ
DE
VENÆ
SECTIONE,

QUAS
DIVINA FAVENTE GRATIA,
DECRETO ET AUCTORITATE
MAGNIFICI & GRATIOSISSIMI
FACULTATIS MEDICÆ
COLLEGII,

PRO
DISPUTATIONE INAUGURALI
AD
CAPESSENDOS HONORES DOCTORALES
SOLENNI ET PLACIDO ERUDITORUM
EXAMINI SUBMITTIT

JOHANNES GOTHOFREDUS STOESSERUS,
ARGENTINENSIS.

ad diem 15 Mens. Maji An. M DC XCIIX.



ARGENTORATI,

Typis JOHANNIS FRIDERICI SPOOR.



V I R O

PERILLUSTRI atq^{ue} EXCELLENTISSIMO

DOMINO

GOTTHOFREDO
STOESSERO,

NOBILI DOMINO DE LILIENFELD,

HEREDITARIO IN DOELKAU &c.

SERENISSIMO AC POTENTISSIMO

ELECTORI BRANDENBURGICO,

A CONSILIIS SECRETIORIBUS,

NEC NON

DUCATUS MAGDEBURGICI

VICE-CANCELLARIO

GRAVISSIMO,

MOECENATI SVO ATQVE PATRONO

OPTIMO,

PATRUO

PATRIAS VICES EXPLENTI,

SACRÆ REGENERATIONIS TESTI

BENIGNISSIMO,

HANC EXERCITATIONEM
MEDICAM INAUGURALEM

DEDICARE,

ET SE ET SUA STUDIA

QUAM HUMILLIME CONSECRARE

DEBUI,

VOLUIT

TANTI VIRI

SUBJECTISSIMUS

DEVOTISSIMUS

CULTOR

JOHANNES GOTHOFREDUS STOESSERUS.



THESES MEDICÆ DE VENÆ SECTIONE.

THESIS I.



Uⁱ Venæ Sectionem in totum rejiciunt, sicut id ex antiquioribus fecit Erasistratus, contra quem, ejusque asseclas Galenus peculiari opere scripsit; ex Recentioribus Joh. Baptista Helmontius, ille per ignem philoso-

phus, Georgius Thomson Helmontii simia, Cornelius Bontekoë acerrimus V. S. insectator, Jan. Abrah. à Gehema calumniis potius, quam eruditione solida nobilis, aliique, illi certe Medicinam remedio generoso, & in pluribus casibus utilissimo, quod multis indicationibus sufficienter satisfacit, & quandoque summe necessario, orbare volunt.

TH. II.

Non sequitur anima & vita latent in sanguine, E. Vena secanda non est: sicuti hæc consequentia non valet, in vino latet vis inebriativa, E. vinum non est bibendum.

T H. III.

Qui contra V. Sectionis verum usum hunc ver-
sum nobis objiciunt;

Discite mortales pretioso parcere succo,
illis alterum regerere possumus:

Tam vitæ fons est, quam necis autor idem.

T H. IV.

Sicuti oborta tempestate naucleri dexteritas ma-
xime elucet, ut quæ pro servanda navi convenient,
prudenter circumspiciat & cordate exequatur, imo
necessitate efflagitante, mercium, etiam pretiosarum,
partem, ut homines & navem ab interitu servet, in
procellosum mare projicit : ita circa sanguinis mis-
sionem prudentia Medica apprime conspicitur, neces-
sitate enim exigente & sanguine copiâ vires gravante,
ita ut Naturæ respuat imperium, eo æstuante & tumultuoso
impetu in aliquam partem irruptionem facien-
te, ita ut aggeres transcendens intra suos alveolos con-
tineri renuat, tunc omnino portio ejus quædam est
deplenda, quo reliquus pacatior in venis fluat. Cum
alias liquorem hunc in sese utilissimum chare haben-
dum & instar pretiosi thesauri summo studio conser-
vandum esse libenter concedamus.

T H. V.

Qui V. Sectionem tanquam in S. Scriptura non
concessam rejiciunt, ex allegatione hujus dicti, *qui*
sanguinem profundit, ejus sanguis quoque profundetur.
næ illi intelligendo faciunt, ut nihil intelligant.

T H. VI.

Istud Remedium tanquam inventum diaboli-
cum non est diffamandum, quod cum plurimorum
salute toto die utiliter instituitur.

T H. VII.

Medicus Naturæ bene operantis imitator, dum
ipsa se quandoque à superfluo sanguinis onere fructuo-
se levat, ejus ductum hoc passu merito sequitur.

T H. VIII.

Abusus non tollit verum rei usum, sic nec sinister
ex male administrata V. Sectione (interdum etiam per
accidens) superveniens eventus ejus legitimum usum
tollit, si enim hæc consequentia valeret, vereor ne
omnis remediorum apparatus esset proscribendus.
Nam,

Vix prodest, quod non ladere possit idem.

T H. IX.

Facilis res est sanguinem è venis evacuare, & li-
quorem vitalem profundere, sed id cum levamine
ægroti facere, id demum est prudentis Medici. Ita
enim cures, ut non noceas.

T H. X.

Thesaurus vitæ in sanguine reconditus est, unde
si aliis mediis ægro æque commode vel cito succurre-
re poterimus, sanguini parcatur.

T H. XI.

Qui Plethoram negant, eam nondum satis firmis
rationibus exploserunt. adde, quod contra Sole meri-
diano clariorem experientiam loquantur. ast ubi
sensus

sensus certam fidem facit, non opus est rationibus.

● T H. XII.

Vixaliter fieri potest in corpore juvenili, optime sano, organis concoctionis bene constitutis, cibo & potu lauto, eoque copioso utente, vitam sine curis secure, sine duris laboribus otiose transigente, quin plethora generetur; Ingens enim ciborum *ὑπερίστων, δ' αὖτε δ' αὖτε δ' αὖτε* δ' αὖτε δ' αὖτε δ' αὖτε, copia in ventriculum bene concoquentem ingesta, chylum copiosum & inde sanguinis magnam quantitatem necessario generat.

T H. XIII.

Non datur certius, promptius magisque securum Plethoræ, morborumque ex Plethora oriundorum remedium, quam V. S. Non enim jejunium & abstinentia æque bene id faciunt.

T H. XIV.

Neque tamen in omni abundantia sanguinem statim mitti necesse est: alii enim, ut Galeni verbis utar, satisfacit inedia, alii cibi parcitas, alii soluta alvus vel purgatio, vel frequens balneum, alii sola exercitatio, vel multa frictio abunde facit.

T H. XV.

Licet sanguis in arteriis contentus non sit plane idem cum eo, qui in venis continetur, ille enim spirituosus magis & serosus esse solet, tamen pro deplenda Plethora non plus præstat arteriæ quam V. S. Cumque arteriotomia sit difficilior, ob situs vasorum profunditatem, tunicarumque densitatem, & periculo-

fior,

fior, ob hæmorrhagiæ & aneurismatis metum, ideoque arteriotomia intermissa V. S. merito præfertur.

T H. XVI.

Ubi V. S. indicatur, aliud tamen contra indicans eam disuadet, cucurbitulæ & hirudines in ejus locum quandoque substitui possunt.

T H. XVII.

Minori cum periculo V. S. administratur quam Purgatio, illam enim regere potest artifex, hanc non idem.

T H. XVIII.

V. S. dum quantitatem sanguinis demit, refrigerat; ideoque in morbis calidis, à sanguinis orgasmo, ebullitione, & nimia rarefactione, vasorumque dilatatione, indeque ortis doloribus & vigiliis commode administratur.

T H. XIX.

Ubi à sanguinis copia & impetu in extremitatibus vasorum ingens provenit dilatatio & tensio, sanguine majus spatium affectante, & sic jam adest *διαθεσις φλεγμονώδης*, nescio, an V. Sectione melius excogitari possit remedium.

T H. XX.

Stante Circulatione Sanguinis, nihilominus V. S. revulsionis & derivationis gratia instituta omnino locum habet.

T H. XXI.

Cum sanguis ex vena aperta *ἀθρόως* ruat, revulsio in fluxum & effluxum sanguinis vitiosum in ordinem revocat. Derivatio sibi relicta alio invitat.

T H. XXII.

In magnis hæmorrhagiis etiam si V. S. revulsoria quibusdam videatur, ac si quis afflicto vellet addere afflictionem, dantur tamen certi casus, in quibus illa laudem suam meretur.

T H. XXIII.

Si V. S. evacuationis universalis gratia instituitur, perinde est, per quamnam venam sanguis evacuetur: si vero pro scopo revulsione vel derivationis ea celebratur, tunc nullo modo delectus venarum est rejiciendus.

T H. XXIV.

Delectus tamen ille venarum, ut in affectibus lienis ea, quæ dicitur salvatella, in capitis, ea, quæ inter pollicem & indicem, vel cephalica brachii, in hepatis vero Hepatica dicta secetur, nullus est.

T H. XXV.

In Revulsione quoad venarum delectum semper ad cor est respiciendum. Sic si pars laborans sanguinem accipit à trunco ascendente arteriæ magnæ, V. S. in pede, sin contra à descendente, in brachiis revulsione gratia instituitur.

T H. XXVI.

Influxu sanguinis in partem aliquam jam facto, frustra de revulsione per V. S. cogitatur, nisi fluxio adhuc duret. Itaque in quarumcunque partium inflammationibus statim ab initio vena aperienda, ut scilicet mature fiat revulsio, antequam influxus fuerit factus, vel vires deficient, facienda item est copiosa & sufficiens depletio, ut nempe vi vacui sanguis alio trahatur.

TH. XXVII.

Revulsio omnis quæ ab extra intro fit, mala, v. c. malignitatis, exanthematum, bubonum, erysipelatis, variolarum, podagricæ materiæ, scabiei, &c.

TH. XXVIII.

V. S. sanguinem ventilat, quatenus nempe motum ejus liberiores reddit, ut celerius circuletur, ne concreascet & in motu subsistat, id quod etiam in oppresse virium & spirituum locum habet.

TH. XXIX.

V. S. ad prognosin facit, ut ex emissio sanguine ejus constitutio innotescat, & de feri sanguinisque proportionem judicium ferri possit. Facit quoque ad curationem, inde enim elucet, an purgantibus, sudoriferis, attenuantibus, dissolventibus, aperientibus, rarefacientibus &c. sit insistendum.

TH. XXX.

Cachexia per se non indicat V. Sectionem, dantur tamen casus, ubi nihilominus ea requiritur, victu laudabili, ut bonus sanguis de super generetur, instituto.

TH. XXXI.

Non datur semper Plethora pura, sed datur quandoque Plethora cacochymica. Evacuata autem parte vitiosi sanguinis, qui reliquus est, eo facilius medicamentis alterari & depurari, & diætâ convenienti superveniente, melior regenerari potest.

TH. XXXII.

V. S. tum præservationis gratia instituitur, ut morbus, antequam causa morbum factura in actum

pat, præcaveatur; tum curationis causa, ut actu jam morbum faciens è corpore tollatur.

T H. XXXIII.

Tempus morbi optimum est principium, non status, non declinatio, & quo velocius morbus ad augmentum properat, eo citius administranda V.S. Principiis enim hic quam maxime resistendum.

T H. XXXIV.

Morbi illi, qui per paroxysmos & circuitus suas exacerbationes habent, tempore intermissionis vel remissionis V. Sectionem requirunt.

T H. XXXV.

In Peste morborum malignorum Principe, reliquisque morbis malignis, V.S. exulet, non enim malignitas per V. Sectionem expugnatur. Cum tamen nulla regula sit sine exceptione, si ea administranda videtur, (quod tamen rarissime contingere existimo) statim ab initio adhibeatur, satius enim est in progressu morbi plane ab ea abstinere.

T H. XXXVI.

Quo majorem malignitatis gradum morbus adipiscitur, eo minus V.S. conducit.

T H. XXXVII.

In Febribus continuis & ardentibus, ubi V.S. indicatur, & tamen metus est malignitatis, statim post V. Sectionem exhibendum est alexipharmacum & cordiale, ne malignitas intro repens cor obruat: ex eadem quoque ratione somnus post V. Sectionem est prohibendus.

TH. XXXVIII.

In Febribus exanthematicis nisi primo statim morbi insultu, parcaque manu & caute instituatur V.S. sub progressu morbi exanthematibus erumpentibus omnino ab ea abstinendum est.

TH. XXXIX.

In Variolis & Morbillis V.S. non semper noxia, maxime adultis, & præcipue iis difficulter, natura humorum copia gravata, prorumpentibus. Quod & in hoc casu hæmorrhagiæ earum eruptionem cum & φο-
εία præcedentes satis demonstrant.

TH. XL.

In acutis, si morbus magnus, æger in vigore ætatis & robustus, vena secanda.

TH. XLI.

Ubi pulsus magnus, vehemens, ac celer, tutius vena secatur, quam ubi frequens, & debilis micat, tunc enim caute est mercandum.

TH. XLII.

In morbo Hungarico venæ rarinae tuto secantur, ventilatur enim sanguis, & ne in motu concreescens subsistat, prospicitur.

TH. XLIII.

Vehemens Febris, ubi rubet corpus, plenæque venæ tument, sanguinis detractionem requirit.

TH. XLIV.

In Febribus ardentibus sæpe omnis calor, omnis febris, una quasi vice aufertur sola V. Sectione; sicuti etiam dolores atrocissimi sæpe unica V. Sectione conquiescunt.

T H. XLV.

In febribus ardentibus ubi V. S. conveniens est, nunquam tamen eo deveniendum, ut sanguis usque ad animi deliquium emittatur, sic enim non tam febrem quam ægrotum ipsum jugulare possemus; quod tamen una vice fieri non potest, melius est, ut id fiat repetitis vicibus, videndum enim, non tam ut cito, quam ut etiam tuto curemus.

T H. XLVI.

In febribus ardentibus tam frequenter reiteratæ V. Sectiones, ita ut parum sanguinis in corpore remaneat, quemadmodum in quibusdam regionibus fieri solet, sicuti in ipsis dictis locis non adeo laudandæ sunt, ita multo minus in nostris & frigidioribus regionibus imitandæ.

T H. XLVII.

Febres intermittentes V. Sectionem per se non adeo suadere videntur, nisi aliud quid urgeat, ejus enim abusu protrahuntur quandoque, & redduntur pertinaciores.

T H. XLVIII.

Quandoque tantum abest ut justo largiorem in Febribus V. Sectionem caloris & doloris remissio insequatur, ut potius calor & cephalalgia quandoque incrementum sumat.

T H. XLIX.

In Capitis dolore V. S. præsentaneum quandoque est auxilium, ita ut illo die sæpe recedat dolor, id quod interdum etiam in doloribus dentium accidit.

T H. L.

In apoplexia sanguinea V.S. utilis, in pituitosa minus; unde Celsi effato in apoplexia V.S. vel occidit, vel liberat.

T H. LI.

In Deliriorum generibus uti Mania, Melancholia, Phrenitide V.S. sæpe necessaria est. Præcipue vero maniacy largam & repetitam V. Sectionem ferunt.

T H. LII.

Epilepsia V. Sectionem per se non indicat, ideoque vix utilis, nisi ab aliqua sanguinis evacuatione prohibita foveatur.

T H. LIII.

In vulneribus præcipue capitis, ejusque contusionibus, & commotionibus insignioribus V.S. in tempore instituta inflammationem, febrem, dolorem, vigilias, deliria &c. præcavere potest.

T H. LIV.

Oculorum dolores V.S. sanat, & in ophthalmia gravi sæpe parum aliis auxiliis proficimus, nisi V.S. earum usui præmittatur.

T H. LV.

In Angina vera venam secare statim ab initio convenit.

T H. LVI.

In Pleuritide præcipue vera, & dolore versus superiora vergente, sæpe insigne primo statim vel altero die adhibita V.S. auxilium adfert. De ejus tamen necessitate ex circumstantiis judicandum; Multoties enim etiam absque V. Sectione curatur.

T H. LVII.

TH. LVII.

Sæpe Asthma à stagnante circa præcordia sanguine oritur, quod frequenter V. Sectione subito levatur. Simile quoque in Catarrho suffocativo contingit.

TH. LVIII.

Quidam qui Cordis palpitatione vexantur, V. Sectionem maxime proficiam experiuntur.

TH. LIX.

Sanguinis ex pulmonibus per sputum rejectio, à copiosi sanguinis impetu oriunda, V. Sectione revulsoria optime curatur: minus vero locum habet, si ab erosione & sanguinis acrimonia ortum trahat.

TH. LX.

Mensibus suppressis, vel non rite fluentibus, & regurgitante versus superiora sanguine, vena saphæna commode secatur, ut sanguis ad uterum derivetur, idque præcipue tertio vel quarto die ante tempus consuetae evacuationis.

TH. LXI.

Morbi qui à suppressa aliqua sanguinis evacuatione foveantur, V. Sectione levantur.

TH. LXII.

In nimio Mensium fluxu sæpe sola sectio venæ in brachio affectum hunc curare potest.

TH. LXIII.

Puerperis Lochiis suppressis commode administratur V. S.

TH. LXIV.

Arthriticis V. S. præservatoria circa æquinoctia convenit.

TH. LXV.

In V. Sectione vires requiruntur robustæ, si tamen vires sint debiles ex oppressione, V. S. coindicatur. Considerandum etiam, an in futurum quoque vires sufficiant.

TH. LXVI.

Ætas juvenilis, media, & senectus viridis, aptissima est V. Sectioni, prima ultimaque ætas non adeo facile sustinet hoc auxilii genus.

TH. LXVII.

Maxime tamen ubi de V. S. instituenda deliberatur, ad vires est respiciendum, ex quibus omnia sunt æstimanda. Firmus enim puer, robustus senex, & mulier gravida valens, tuto curantur. Non enim interest quæ ætas, sed quæ vires sint.

TH. LXVIII.

Graciles liberaliorem V. Sectionem ferunt obesis, quibus damnum à copiosa sanguinis detractione facile contingit. Serosis enim humoribus oppletur eorum corpus, facileque in cachexiam degenerat.

TH. LXIX.

Nimium ne crede colori. Non enim rubicundus faciei color semper Plethoræ index est, is enim & quandoque in scorbuticis, cachecticis, phthisicis, hydropicis apparet. Sæpe ii qui sunt pallidi, sanguine abundant.

T_H. LXX.

Quibus natura debilius vel frigidius est corpus, illi læduntur magis ex sanguinis evacuatione, quam ut opem inde sentiant.

T_H. LXXI.

Calidarum & Meridionalium regionum incolæ, vinum item bibentes, facile ferunt V. Sectionem.

T_H. LXXII.

Αἰμοφίλοι non sunt ad sectionem cogendi. Nul-
lum enim violentum Naturæ est proficuum.

T_H. LXXIII.

Gravidis ex plethora morbum vel abortum ti-
mentibus, aut morbo aliquo magno laborantibus,
commode V. S. præscribitur, mediis etiam mensibus.

T_H. LXXIV.

Sæpe tantum abest ut V.S. in gravidis abortum
procuret, ut potius ab eodem in sanguineis præservet,
& nisi detrahatur pars abundantis sanguinis ille fœ-
tum protrudat. Dum enim pars sanguinis evacuatur
reliqua massa ad sui prurptionem ex utero molien-
dam, sine qua raro datur abortus, ineptior redditur.

T_H. LXXV.

In illis fœminis, quibus menses non amplius flu-
unt, consultum est bis vel ter in anno sanguinem mit-
tere. Quod & Hippocrates de iis prædicat, quæ in
sterili conjugio vivunt.

T_H. LXXVI.

Cum menstrua naturaliter fluunt, nulla V. Se-
ctione opus est, nisi magna necessitas cogat.

TH. LXXVII.

Interdum purgatio V. Sectioni præmittenda, interdum V.S. purgationi, pro hujus vel illius indicantis urgentia. Si tamen alvus est obstructa, & V.S. inducias ferat, alvus prius blande leniente aliquo vel clystere moveatur.

TH. LXXVIII.

Tempus V. Sectionis aliud electionis, aliud necessitatis. Tempus optimum præservationis gratia est ver & autumnus.

TH. LXXIX.

Sub cane & ante canem, media æstate & hyeme, minus tuto, extra casum necessitatis, vena secatur.

TH. LXXX.

Post ver convenientior autumnus, hyems minus apta autumnus, omnium ineptissima V. Sectioni est æstas.

TH. LXXXI.

Necessitas cum careat lege, non curat ullum tempus, sed tum quovis mense, die, hora, etiam vespertino & nocturno tempore urgentibus malis venam secare licet.

TH. LXXXII.

Quoad electionem temporis non adeo superstitiose cœli & siderum positus observandus, nec ex Calendariographorum tabulis commodum tempus aucupandum. In Novilunio tamen, silente Luna, & Plenilunio ipso, item si Ecclipsis Solaris vel Lunarum instat, ea consultius intermittitur.

TH. LXXXIII.

Dies optime eligitur sudus, placidus, serenus, temperatus, prænebuloso, ventoso, pluvioso, & frigido.

TH. LXXXIV.

Tempus diei optimum est matutinum, hora à Solis ortu circiter tertia vel quarta, tum enim sanguis in corporibus à sole suscitatur & extenuatur, coctione peracta, & excrementis per alvum & vesicam evacuat, nec statim ubi à somno surrexeris, sed ubi ad horam unam vel alteram vigilaveris, venerisque exercitio nocte præcedente intermissa.

TH. LXXXV.

Venæ quæ secari solent, sunt venæ frontis, raninæ seu sublinguales, jugulares, rarius tamen; In brachio sunt cephalica, Basilica, sub qua arteria, & mediana, sub qua nervus, & bicipitis musculi tendo latet; ex quibus ea quæ magis apparet sine delectu secanda. In manu prope pollicem cephalica die Haupt-Ader/inter digitum minimum & annularem salvatella die Milz-Ader/ quasi salvet illa dicta. In pedibus ischiatica die Brand-Ader/ circa talum prope malleolum internum saphæna die Rosen-Ader/ vena pollicaris prope pollicem pedum die Haupt- oder Ruck-Ader/ inter minimos digitos salvatella pedum die Gicht-Ader/ vulgo dicta.

TH. LXXXVI.

Venarum pone aures sectio non infert sterilitatem, imo quandoque in dentium doloribus summe proficua est.

TH. LXXXVII.

Ante V. Sectionem non danda sunt opiata vel adstringentia, ne sanguinis effluxus impediatur.

TH. LXXXVIII.

Consuetudo introducta, ut tempore veris & æstatis venæ dextræ lateris, autumnii vero & hyemis sinistri secentur, non adeo religiose observanda est.

TH. LXXXIX.

Quantitatem mittendi sanguinis, vires, ætas, corporis habitus, tempus, sanguinis copia, fervor, ebullitio & impetus, ipsiusque affectus magnitudo determinabit.

TH. XC.

Non tamen ad plures libras, id quod à Veteribus factum fuit, ascendendum, sed ultra libram unam in summa urgentia vix progrediendum. Tutius enim est infra subsistere. Præstat enim bis tuto, quam semel male.

TH. XCI.

Semper ante finis mittendi sanguinis faciendus, quam anima deficiat.

TH. XCII.

Usitato sanguis emittitur ad ʒvj. viij. quæ media est dosis. Medio tutissimus ibis.

TH. XCIII.

Si eodem die V. S. repetenda, oleo vulnuscum illinatur, seu phlebotomo oleum illinatur. Pingua enim consolidationem impediunt.

T H. XCIV.

Venæ tam lancetta, quam phlebotomo commode aperiuntur.

T H. XCV.

Artus confricentur dum incalescant ac emicent venæ, & in loco versus cor pars arctius vincitur, ut sanguine in recurſu verſus cor aliquatenus impedito, vena tumentior in conſpectum ſe det, & quo major reniſus appareat, nec vena tam facile de loco moveatur, ſiniſtræ pollice eam firmet, imo ſi tremula inconfanſque vena ad ſcalpellum quemvis impulſum ſubterfugit, vel è ſede ſua diſſilit, infra etiam vinculo conſtringi moſ eſt; Si in manu vel pede vena aperitur, quo tumentior appareat, calidæ ante aquæ immergitur.

T H. XCVI.

Lipothymia, quæ quibuſdam quotieſcunque vena ſecatur, ſupervenit, optime præcavetur, ſi præbiant juſculum vel medicamentum confortans, & decumbentibus non vero ſedentibus, venæ item minores magis aperiuntur.

T H. XCVII.

Si in Lipothymiam incidat, aqua frigida facies conſpergenda, acetum roſaceum naribus exhibendum, vel aqua Reginae Hungariæ, vel aliis odoratis naribus admotis deficientem refocillabis, conſtrictionem vinculo remiſſo ſolves.

T H. XCVIII.

Aperta vena ut ſanguis è brachio eo melius fluat, bacu-

baculus manu detentus agitetur, manus fortiter comprimatur, si non fluat tussis imperetur.

TH. XCIX.

Promiscue tam subtilis & fluidus, quam crassus per foramen factum exit, nec refert an parva seu magna apertura fiat; quantitatem aperturae vasis magnitudo determinabit.

TH. C.

Parvis fissuris utendum in phreneticis, aliisque mente motis, ut celerior vulnusculi conglutinatio fiat.

TH. CI.

Sanguis effluens non in commode diversis vasculis excipitur, ut differentia prioris à posteriori innotescat.

TH. CII.

Non statim post V. Sectionem cibus est sumendus, nec copiosus: ebrietas etiam nociva, post illam enim concoctio est debilior.

TH. CIII.

Cui sanguis phlebotomia diminutus est, haud ad consueta munia properet, neque celerius inambulet, neque ullo exercitationis genere se fatiget, neque venere utatur, animi perturbationes fugiat, una vel duabus horis post, alimentum boni succi & facilis concoctionis assumat, sumto cibo, conversatione & suavioribus colloquiis totum diei tempus fallat.

TH. CIV.

Peracta V. Sectione non statim superdormien-
dum,

dum, in iis tamen, ubi vigiliæ contumaces præcessere, vel ingentes dolores, & simul metus malignitatis abest, si somnus obrepat, aliquot post horis ad virium refectiorem concedi potest.

TH. CV.

Falsum est primam V. Sectionem à morte liberare. Hoc tamen facile concesserim, primam V. Sectionem longe maiorem alterationem inferre, quam in iis, qui illi jam à longo tempore assueti sunt.

TH. CVI.

Chirurgorum lucrosum commentum est, ei qui semel vel aliquoties V. Sectione usus fuit, singulis deinde annis Vere & autumno esse continuandum, potius res est indifferens, & de ejus necessitate judicandum ex indicantibus. Non enim ex actione semel iterumque celebrata sed pluribus vicibus longoque tempore exercitata consuetudo nascitur, & frustra usurpatur remedium, cujus indicans desideratur.

TH. CVII.

V. S. à longe jam tempore consueta non subito intermittenda plane, ad magnos enim potest disponere morbos.

TH. CVIII.

Sanguis pro temperamentorum diversitate plurimum differt, & in sanitatis latitudine maxima ejus est varietas.

TH. CIX.

Si paulo post cibum vel potum sumptum vena secetur, item sub febrium intermittentium insultus, sanio-

faniosum eum, incoctum, plurimoque sero scatentem reperies.

T H. CX.

Qui sanguis impetuose profluit, copiam sui, fervorem ac cor robustum notat; qui stillat, infirmum insinuat cor; mox vel tarde concreescens crassitiem vel tenuitatem. Crassus & viscosus obstructionibus est obnoxius.

T H. CXI.

In sanguine per V. Sectionem emissio consideranda, color, an rutilus, cæruleus¹, pallidus, lividus, viridis &c. Proportio feri & sanguinis quam erga se invicem habent. Spuma seu bullæ. Consistentia, an glutinosus, tenuis, fluxilis, viscosus &c. Contenta item quandoque. Sapore quoque serum examinari potest, an salium copia in eo exuberet.

T H. CXII.

Sanguis impense coloratus & rutilus vena secta emissus morbi maligni sæpe signum est.

T H. CXIII.

Sanguis apparenter bonus, non raro funesti exitus prodromus.

T H. CXIV.

Fœtor omnis in sanguine malus. Graveolentia feri & cruoris licet rara, certam tamen mortem denotare non sine contagii suspitione experti sunt Medici.

T H. CXV.

Cruor lividus, viridis tam corruptionem sui testatur, quam effervescentiæ & turbulentæ fermentalis signa præbet.

TH. CXVI.

Sanguis emissus tardius vel nunquam concreescens ejus corruptionem denotat, extinctionemque caloris vitalis.

TH. CXVII.

In febribus ardentibus si sufficiens & proportionata feri quantitas adsit, bonum; sin minus, contra.

TH. CXVIII.

Serum copiosum nimis supernatans, pravæ coctionis indicium, viscerum debilitatem, vel potum copiosum denotat.

TH. CXIX.

Spuma ac bullæ in medio pelvis rubicundæ fervorem ac ebullitionem fortem; candidæ lentorem in sanguine produnt.

TH. CXX.

Crusta alba, quæ visitur in superficie sanguinis, ventriculi debilis soboles est, & est chylus qui cordis obsequium eludit, nec in perfectum & spirituosum sanguinem est transmutatus. Vitium enim primæ coctionis non corrigitur in secunda. Crusta variegata, colore viridi, flavo, corruptelam sanguinis ulteriorem indicat.

TH. CXXI.

In Lue venerea sanguinem cæruleum vel viridem apparere loquuntur experti, id quod in Scorbutto quoque interdum contingit.

TH. CXXII.

Color nigricans, qui in sanguine in fundo vasis hærente conspicitur, non est melancholicus eruor; sed color nigricans exinde est, quod sanguis qui est in fundo

fundo patinæ aëri non sit expositus, non vero ex ulla melancholiæ mistura.

T_H. CXXIII.

Non raro sanguis emanans diversæ naturæ & consistentiæ subinde observatur, præcipue in Pleuritide & Peripneumonia, pro inæquali nempe ipsius sanguinis miscela & corruptione.

T_H. CXXIV.

Superficies sanguinis ubi post consistentiam marmoris instar est variegata, insignem humorum in massa sanguinea confusionem, putredini obnoxiam, diaphoreticis cohibendam, testatur.

T_H. CXXV.

Saniosa vel cinerea livescens, cruditatem, ex impedita fermentatione, & spiritalfcentia natam, antiscorbuticis, sale volatili abundantibus, tollendam arguit.

T_H. CXXVI.

Si sanguis instar hepatis vel parenchymatis cujusdam concrefeit, incidentia, attenuantia, aperientia requirit.

T_H. CXXVII.

Ubi vires debiles ex resolutione, nulla adest plethora, primæ viæ humoribus excrementitiis scatent, appetitus prostratus, dejectionum copia, V. S. nocet.

T_H. CXXVIII.

A frequenti sanguinis detractiōe nonnulli memoriæ jacturam observarunt.

T_H. CXXIX.

Vena intempestive & frequentius secta spiritum pariter cum sanguine exhaurit, innatum calorem eripit

pit & dissipat, principes partes refrigerat, ut quasi enervatæ & debilitatæ languescant, unde pallor & decoloratio corporis, cruditates multæ, à quibus mille incommoda, morbi diuturni & exitiales, præcipue Hydrops.

T_H. CXXX.

Morbi frigidi diuturni à cruditatibus, cacoehymia, colluvie serosa oriundi per se V. Sectionem non indicant.

T_H. CXXXI.

Abusiva & frequentior V. S. ad cachexiam, Hydropem, morbosque frigidos disponit. Imo in juventute crebrior sine necessitate instituta, temperamentum admodum immutat, citam senectutem & hanc gravioribus morbis obnoxiam adducit.

T_H. CXXXII.

V. S. varia ratione artificii negotium, & patienti molestiam adfert, dum vel vena secanda ob situs profunditatem sese non offert, & vasa sunt parva admodum, vel cultelli aciem ob mobilitatem subterfugit, vel venæ & cutis vulnus sibi invicem non respondent, unde ecchymoma oritur.

T_H. CXXXIII.

Phlebotomia olim inter ignominias in Romana militia recensita.

T_H. CXXXIV.

Remedia uti in genere, ita & V. S. necessitate exigente dextre à prudenti Medico usurpata, sunt veluti δεξιὴ χεῖρες; sinistre vero ab imperitis medicastris in usum tracta, sunt veluti gladius in manu furiosi.

F I N I S.